

TARIKH: 8 FEBRUARI 2022

SURAT KHABAR: HARIAN METRO

MUKA SURAT: 21

## Papa rayu kerajaan bawa masuk pembantu rumah dari Filipina

**Kuala Lumpur:** Persatuan Agensi Pekerjaan Malaysia (Papa) merayu kepada kerajaan supaya membawa masuk pembantu rumah warga asing dari negara sumber lain seperti Filipina terlebih dahulu, sementara menunggu rundingan dengan Indonesia diselesaikan.

Presiden Papa, Datuk Foo Yong Hooi berkata, langkah berkenaan lebih praktikal, malah kerajaan tidak mempunyai alasan munasabah untuk terus menunggu persetujuan Indonesia.

Katanya, tindakan sedemikian bukan bertujuan memberi tekanan kepada Indonesia kerana rundingan masih berjalan, sebaliknya bagi memenuhi keperluan mendesak pembantu rumah di negara ini.

"Papa merayu kerajaan Malaysia membuka kemasukan pembantu rumah dari Filipina dan negara sumber lain terlebih dahulu sementara menunggu rundingan dengan Indonesia

mencapai kata sepakat.

"Saya tidak nampak ada alasan munasabah untuk menunggu lagi. Sampai bila kena kena tunggu? Lebih baik buka dahulu kemasukan daripada negara sumber lain yang tidak memerlukan memorandum persefahaman (MoU)," katanya ketika dihubungi, semalam.

Rundingan pengambilan dan kemasukan pembantu rumah warga Indonesia ke Malaysia yang dimulakan sejak 2017, masih gagal diselesaikan dalam tempoh terdekat dengan MoU dijadual dimeterai kedua-dua negara hari ini, terpaksa ditangguhkan.

Menteri Sumber Manusia Datuk Seri M Saravanan berkata, ada beberapa isu berbangkit yang menyebabkan kelewatan memuktamadkan rundingan pengambilan dan kemasukan itu, namun di pihak Malaysia, sudah diselesaikan perkara yang dibangkitkan.